

Գինետունները լեփ լեցուն են: Օղին ածուխէն արժան է:

Կուրծքի տկարութիւն ունեցողները վառարանին քով կնստին եւ *Խիկար* կկարդան: Խիկարի քանի մը թուղթ ընթերցումն միակ դեղ է կուրծքի տկարութեան դէմ. շնչափողերը կմաքրէ:

22 - 29 Փետրուար

Խառնակ օդ:

Խառնակ լուրեր:

Տեսէ՛ք սա խեղճ գաւառացին. գլխէն արին կը վազէ:

Կնկան մէկը մարտ նետեր է². անուշադրութեամբ մարդուն գլուխը նետեր է սափորը պատշգամէն:

Լրագրաց խօսքին մի՛ հաւատաք:

Մայրէ՛ր.

Եթէ իմ խրատիս կլսէք՝ այս ամսուան մէջ զաւակ մի՛ բերէք, ո՛չ մանչ, ո՛չ աղջիկ. վասնզի Փետրուարի մէջ ծնող մանչերն գինեմոլ ու կերուխումի անձնատուր կ'ըլլան, իսկ աղջիկներն շռայլ ու պարասէր կ'ըլլան, իսկ երբ կարգուին՝ իրենց ամուսնոյն գլխուն փորձանք կ'ըլլան:

Բո՛ւմ...

Մի՛ վախնաք:

Մեծ վաճառական մը սնանկացաւ, բան մը չէ:

ՄԱՐՏ

1 - 9 Մարտ

Հողմ, անձրեւ, ձիւն, արեւ...

Օդերու *ֆաթուրա*:

Կխրատեմ ծերերուն ու վատառողջներուն դուրս չելնել. փառք Տիրոջը, դուրս ելնելու պատճառ մ'ալ չկայ. առեւտուրները դադրած են, ամեն մարդ փոխառութիւն ընելու համար միայն դուրս կելնէ:

² Յոյներից վերցնելով հայերն էլ Մարտ 1-ի գիշերը պատուհանից փողոց են գցում մի խեցեղէն անօթ, հաւատալով որ դրանով նոյն տարին լուրերը պիտի պակասին տանից: Այս գործողութիւնը անուանում է «Մարտ նետել»: